

淨土摘要寶鑑

淨土摘要寶鑑
卷之三

淨土摘要寶鑑

新平社
PDF

淨土摘要寶鑑序

原夫世之有所染汚者。不得謂之淨。有可比類者。不得謂之要有可思議者。不得謂之寶。然諸佛寂滅國土。一切功德感而隨現。三途八難。惡名尙無。其淨最極者也。如來所說經藏。包法界共異之名。同名方廣。統諸教差別之號。總號華嚴。其要最切者也。生佛平等心性。最聖最靈。其明如鑑。形

來則影現。形去則影滅。其寶最上者也。以要言之。分而爲佛土。經藏心性而合爲毘盧遮那。至理是也。夫至理微妙。原非落於形裔。本肇無極。詎可屬於言詮。衆生曠蕩。聖者不啻。慧命跡於周朝。金身夢於漢帝。吾佛世尊。出廣長舌相。徧覆三千大千世界。垂身大夏。蔭教三千。搖唇弄舌。止啼黃葉。經談三百餘會。權設一代化儀。大法東

流三乘導機。諸祖判教傳燈。非一無非。欲令衆生。因指見月。借教觀心。因筌蹄而獲魚兔。棄草菴直達寶所耳。良由末世習重。根鈍頭迷。障深慧淺。退屈下流者。往往不足論矣。卽石火管窺者。雖欲勉強進道。悉陷於羣邪。執魚目以妄認明珠。待空華而邀結空果。有著於事相。不達本性者。有謬解經義。自以爲是者。有外現清白。內懷詐

僞者有恃已聰明而稱慧性者。有守枯木
而言禪定者。有專記名言以資談柄者。有
輕視念佛反謗小乘者。有妄用呼吸以爲
妙法者。如是等類。深可痛傷。又或有厭其
文繁而不讀者。讀而不信者。信而不行者。
行而不久者。是皆教理未明。遠離知識故
耳。豈不見華嚴經云。譬如闇中寶。無燈不
可見。佛法無人說。雖慧不能了。爾時有正

通禪師。通權達實。三祇因滿。萬德果圓。宿願未周。示同生滅。命生於清代。曲陽縣。乾隆歲次五十八年八月十一日午時誕降。九歲剃髮。從釋。幼覽儒典。壯閱佛經。梵行清白。頭陀自活。念佛誦經。自行化他。會三歸一。空有齊彰。周履八方。苦行不辭。年二十三歲。雲遊於蔚蘿境界。宿有善因。爲衆生作不請之友。以慈悲利物。以智慧覺人。

廣設一蓮宗教法。殷殷指示。諄諄互說。苦口叮嚀。普勸念佛。宏揚佛化。利鈍齊收。由是僧俗等衆。信受奉行。者殊非寥寥矣。禪師興慈運悲。豈徒爾哉。恒思深惟。乃曰。人身難得。佛法難遇。以人傳法。人去法滅。僅化一代。以法傳人。人去法流。浩劫不滅。但慮末世衆生。善力微歟。罪根深濃。未能廣學多聞。窮究教典。入門無由。下手無際。况

文言浩瀚。宗趨幽深。望洋者衆。生信者尠。於是禪師採取諸經。廣搜衆典。條紛縷晰。削去繁文。精撰要旨。或繼述原語。或親口便宜。布列條章。鋪成篇目。親筆著稿。彙成斯集。遂錄成軸。目之曰淨土摘要寶鑑。一部三卷。言簡而理當。文約而義豐。如杲日麗天。羣昏灼破。皓月當空。諸有清涼。正如宗鏡云。演廣非多。此是一中之多標畧。

非一。此是多中之一。度可使後之學者。省其徧討之力。如未陟崑崗。獲美玉於目前。不涉滄海。見竒珠於掌上。一覽斯文。而週難窮之教海。便闢一隙。以見無極之太虛。誠抉醫目之金鑑。起沉疴之良方也。信知餘門學道。如蟻子上於高山。半時一步。念佛一門。似風帆行於順水。須臾千里。此一句阿彌陀佛。是阿伽陀藥。無病不療。是如

意珠王。無願不滿。是生死苦海之慈航。無苦不度。是無明長夜之慧燈。無暗不破。但得一歷耳根。便爲有緣。諸佛同宣。菩薩共讚。五乘全收。三門總攝。遂使三草二木。咸歸一地之榮。邪種蕉芽。同霑一雨之潤。其功甚高。其行甚易。上品卽登佛階。下品猶勝天宮。如斯佛言不信。何言可信。淨土不生。何土可生。人道不修。餘道不及。莫教一

日路頭差。千佛出世難救度。惟願一切衆。
生信深願切。觀此經如寶鑑。視三界如牢
獄。覩生死如冤家。見邪法如矛刺。反妄歸
眞。實心達本。以佛知見爲知見。只須赤體
擔當。久久勿替。管取金臺可以坐待。寶蓮
不日來迎。是爲從娑婆同居。生淨土同居。
橫出三界。較之豎出三界者。豈不亦省力
也哉。注目觀心者。始知禪師纖毫不爲益。

已克荷大法一片婆心。可謂眉毛拖地矣。
無奈幻軀不久。緣盡則滅。於同治甲子秋。
歲次三年。禪師延壽七旬有二。在蔚郡城
西北四十里許。四分山彌陀古刹。三月二
十七日。午時圓寂。跏趺而坐。成龕供養。三
七之辰。異香滿室。遠近觀者。不計其數。禪
師雖著其稿。未登梨棗。傳之不廣。年湮世
遠。難免掩晦。弟子僧俗人等。於同治戊辰歲

次七年。各捐已資。附梓刊刻。印施流通。常住不滅。現在未來。堪作寶鑑。見聞隨喜。皆植道種。俾得佛日重輝。法輪常轉。庶不負禪師宏法利生一片婆心云爾。

弟子 僧俗等衆虔誠督理始刊

皆

大清同治戊辰歲次七年又四月吉日成造

無名氏自作序語

余生於保府曲陽縣。九歲於黃山寺出家。恩師慈悲嚴禁。十歲送於書館。習讀儒書。日日回寺。早晚諷經。十年有餘。年一十九歲。恩師傳示修行法門。誦經念佛。而余也喜閱教典。智慧淺薄。佛家深旨奧意。難曉難明。心發慚愧。年二十歲。從本寺出外雲遊訪叅。年二十三歲。遊到蔚羅境界。僧俗老幼。尙無一人識者。觀察此地。有佛善根。余先以錢誘小兒。念阿彌陀佛。次第老者壯者。或讚歎。或稱念。頗有幾人。年三十歲。於西域雲居寺具足禁戒。復回此地。普設一蓮宗法。

門余雖不敏。頗知四恩難報。佛法難逢。於是以己之劣智。揀閱諸經語錄數百餘條。名曰淨土摘要寶鑑。流傳此世。與後之學者。作爲進道之階梯耳。淨土摘要寶鑑上卷目錄計開

諸佛菩薩因地品第一 三教聖人因地品第二

三教優劣品第三 四衆因地品第四

諸大祖師因地品第五 帝王因地品第六

布施因果品第七 持戒品第八

精進品第九 禪定品第十

般若品第十一 敬佛敬僧品第十二

造像造塔品第十三

誦經念佛考證第十四

譬喻品第十五

至心懺悔品第十六

惡業報應品第十七

淨土摘要寶鑑中卷目錄計開

勸信品第十八

出家品第十九

奉事二親品第二十

聞法品第二十一

念佛規則品第二十二

戒貪名利品第二十三

報佛恩品第二十四

度眾生品第二十五

妙用品第二十六

業由心造品第二十七

辨明異端品第二十八

諸經語錄品第二十九